

En pia memoria

20.12.85 GR

## Stiafen Caduff, Rueras

Ed ins sto danovamein repeter – da quellas baselgiadas sco en Tujetsch dat ei strusch zanua, sco per semeglia a caschun d'ina sepultura. Ils fideivels che sesentan buca persuls e sepeglion en culs cumbels els bauns. Igl ei la veta da cumionza che lai buca piarder il tegn.

Stiafen Caduff ei naschius il di suenter la fiasta da sogn Stiafen dils anno 1913 a Rueras. Tschun soras e dus frars ein semess cun el a pèr ed il cuors dils dis ella casa sil crest ha viu ora bein. Entochen ch'il bab ei morts, igl onn 1925, avoncaduras. La mumma Catrina, ina vischina neu da Medel, ha tuttavia buca dau per cattau. Ella ch'ei vegnida sustenida da siu parent Sep Antoni Schmed da Zarcuns ha semplamein fatg vinavon.

Il Stiafen ei daus siado in stupent giuven ed ils aspects dalla veta ein vegni gronds. El ch'ei sesentius bein ed ha schizun priu ora la gniv dil tschéss enta Pardatsch, il Stiafen Caduff ed il Felici Monn ensemblamein. – Cun ventgaquater onns eis el semess en cun la Barla Hendry da Cavorgia ed il fem ei ius ad ault vinavon.

Buca meins che duas casas ha il Stiafen baghegiau, l'emprema per trer si las tschun buobas ed in buob (la mesdad ha el giu vendiu a siu quinau Sep Martin Monn) e l'autra, la pintga, per seretrer e star da siu persei. E baghegiar ina casa ei per cass in strapaz. Stiafen Caduff ei denton buca mo sestantaus dils baghetgs; el ha è fatg il pur scosauda, trasora cumprau prau e runcau el da rudien. Pudeva el mintgamai vonzeivi sin Scharinas, lu eis el staus ametsch. Aschia persuls sigl ault e schi datier d'enzagatgi.

E pér ils accords ch'el ha surprui, il Stiafen Caduff cun siu soci Vigeli da Meidel (Vigeli Giger da Rueras), pongir lavurs pli pintgas, naven d'oragidem la val tocca sillas alps da Tujetsch, sco per exempla da cavar fundament e cavigliar conducts dad aua e sugars da cabel. Tut lavurs per las qualas els dus han fatg not. Cun luvar bunamein il tgau giud la persuna ha il Stiafen Caduff saviu metter enzagatgi d'ina vart. La stenta ei quella che ha fatg daventar el leds, el che veva in plaid cunvegnent sin bucca ed il spass el tgau, cintinuadamein promts da far ina stoda.

Il di ch'ins ha tratg la sort dil funs, ha il Stiafen Caduff da Rueras giu cletg. Las treis parcellas (Curtin, Giuv e Scharinas) ein stadas per el ina gronda legria; quei ei iu bein, scheva el mintgaton, era cura ch'el ha fatg las scarpas dalla viafier, naven dalla Val Zarcuns entochen a Sumsassi.

S'entelli, cun ina sort semeglionta



vess il Stiafen fatg bugen il pur. Mo davos noda ha zatgi tendiu in latsch – la malsogna faulsa e perfida. Era il mument ch'el ha vendiu sias tschun davosas vaccas eis el buca cedius, plitost sefatgs si da detschiert, ha nuau si il tgau ed ei ius denter la glieud ed ha detg als auters da tener vitier. Pongir tocca il pli davos ed adina cul desideri nundetg d'aunc ir inaga si Scharinas e durmir ella tegia sigl ault.

Empei da Scharinas eis el, il Stiafen Caduff-Hendry da Rueras, turnaus el spital a Glion, nua ch'el ha spitgau indulgentamein si'ura ch'ei vegnida ils 21 da november 1985.

Per aschidadir – Stiafen Caduff ha schau anavos dapli che duas casas ed in bi funs; el ha mussau ora ed ha dau igl exempla da vegnir a frida cul pir. Alla Barla ed als ses tucca ei da dar il maun e da dir da far il medem.

Vic Hendry